

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus-- www.donostia.ehbildu.eus -

KONTROL MOZIOA

Donostiako Piratek bidalitako gutunari dagokionez

EH Bildu udal taldeko zinegotzi Reyes Carrere Zabalak, Udalbatzaren Organo Araudiko 98. artikulua oinarri hartuta, mozio hau aurkezten du Udalbatzan azter dadin. Mozioa 2022ko uztailaren 11n, Pertsonentzako Zerbitzuen Batzordean, aztertutako interpelazioaren ondorioa da.

JUSTIFIKAZIOA

Ekainaren 30ean, Donostiako Udaleko Berdintasuneko zinegotziak Donostiako Piraten lantalde feministaren gutun bat jaso zuen, non Udalak Aste Nagusian jarritako puntu moreei buruzko gogoeta eta proposamen batzuk egiten diren. Donostiako Berdintasun Kontseiluko kideok horren berri izan genuen Berdintasun Sailak uztailaren 5ean, asteartean, bidalitako mezu elektronikoko baten bidez.

Harrigarria den arren, Piraten lantaldekoek ez dute zinegotzi delegatuaren erantzunik jaso. Gaiaren premia eta larritasuna dela eta, ez da arrazoa ulertzen. Premiazkoa da, Aste Nagusia hasteko hilabete eskas geratzen delako; eta larria da, Gipuzkoan eraso sexistak hirukoiztu egin direlako azken urte honetan (eta, zentzu horretan, ez dugu ahaztu behar 2019ko jaietan salaketa ugari jaso zirela Piraten Espazio Morean).

Zalantzarik gabe, Berdintasuneko zinegotzi ordezkariak jaso duen gutunean egindako gogoetak oso interesgarriak eta kontuan hartzekoak dira:

- Jai-gune horretan ez gertatuta ere, emakume asko gerturatu ziren La Flamencaren Espazio Morera eraso edo jazarpen sexualak salatzen.
- Espazio horrek gutxieneko baldintzak - intimitatea eta lasaitasuna – biltzen zituen, emakumeak babestuta eta seguru senti zitezten.
- Jaietan salaketa-gune egokiak jartzeari dagokionez, Piratek gabezia bat bete zuten.
- Salaketa-guneetan, beharrezkoa da profesionalak egotea -hau da, psikologoak eta gizarte-laguntzaileak- biktimak behar bezala artatzeko.

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus-- www.donostia.ehbildu.eus -

Gutunean, gogoeta horiez gain, proposamen hauek irakur ditzakegu: puntu more gehiago jartzea, batez ere gaueko aisialdirako guneeetan (kaia, Sagues, Bulebarra...); espazio seguruak eta intimoak izatea, La Flamencakoaren antzekoak, eta, azkenik, biktimei arreta egokia emateko profesional kualifikatuen beharra.

Baina Piraten lantaldea ez da gogoetara eta proposamenera mugatu. Gutunean konpromisoa hartzen dute Udalarekin lankidetzan aritzeko proposatutako espazio more berrien diseinuan, antolaketan eta hedapenean.

Batzordean interpelatuta, Udal Gobernuak erantzun zuen positibotzat jotzen zutela Piraten lantaldearen lankidetzaren eskaintza, eta gutun hori Berdintasun Saileko teknikariek ekainaren amaieran talde horretako ordezkariekin izandako bileraren ondorioa dela, eta 15 eguneko epean beste bilera bat egitea aurreikusita zegoela.

Onartu zuen —guztiok pozten gaituen albistea — Piraten talde feministarekin harremanak arinagoak eta kooperatiboagoak direla aurreko urteetan baino. Aitortu zuen, baita ere, Udal Gobernuak jarritako puntu moreak informaziokoak eta prebentziokoak direla, eta emakumeen aurkako indarkeria prebenitzea dutela helburu nagusi, ez arreta ematea. Eta Berdintasun zinegotzi ordezkariaren arabera, hori da Udaleko puntuen eta La Flamenca jaiguneko Espazio Morearen arteko alde nagusia. Gaueko ordutegiari dagokionez, zehazteke dagoela esan zuen eta, oraingoz, ez dagoela aurrekonturik gehiago instalatzeko.

Baina, Udal Gobernuaren ordezkariaren hitzetatik ondoriozta dezakegu funtsezko baliabide bat bete gabe geratuko dela: gaueko jai-gune batean arretarako puntu intimo eta seguru bat jartzea, non eraso baten biktima den emakumea gaueko edozein ordutan artatu ahal izango den; genero-indarkerian adituak diren profesionalekin eta, emakumeak nahi izanez gero, salaketa judizialaren aurreko urrats gisa balio dezake.

Horiek horrela, behean sinatzen duen zinegotziak KONTROL MOZIO hau aurkezten du:

KONTROL MOZIOA

- Udalbatzak eskatzen dio Udal Gobernuari Aste Nagusian jarriko dituen puntu moreetako baten ordutegia luzatzeko aukera azter dezala, gau osoan irekita egon dadin.
- Udalbatzak eskatzen dio Udal Gobernuari Udalak Aste Nagusian jarriko dituen puntu moreetako bat, informazio-gunea izateaz gain,erasoen biktimantzako premiazko arreta-

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus-- www.donostia.ehbildu.eus -

gune gisa gaitzea, berehalako arreta espezializatua jaso ahal izateko; intimitatea eta premiazko arreta bermatzeko, espazio honek beharrezko baliabide material eta giza baliabide guztiak izango ditu; gainera, gobernuak publizitatea eta sozializazioa egingo du, ahalik eta pertsona gehienek ezagutu dezaten espazio hori.

- Udaltzak eskatzen dio Udal Gobernuari udan hirian banatutako puntu more guztietan egiten diren eraso sexisten salaketa sozialen zenbaketa egiteko konpromisoa hartzeko, kontaketa horretan udal departamentuetan egiten direnak barne hartuz, eta txosten hori urrian argitaratzeko.

Donostia, 2022ko uztailaren 15ean

Reyes Carrere Zabala,

EH Bildu udal taldearen zinegotzia.